

మావంగ్ వేసుడింగ్



మూడవ పుస్తక్

Our Stories (māvāṅg vēsuding)

Third Book (mūḍava pustak)
A collection of stories for new
readers of the Gondi language.

Authors:

Various

Edited by:

Pendur Durnath Rao
Mark Penny

Published by:

Integrated Tribal Development Agency (I.T.D.A.)
Utnoor, Adilabad District, Andhra Pradesh

In association with:

SIL International – *Partners in Language Development*

Illustrations by:

Christoph von Fürer-Haimendorf (1948)
U. Vishwanath
Joanna Penny

Copies printed:

October 2006, 300 copies
January 2008, 1000 copies

Copyright:

This compilation is copyright © 2008. Anyone is permitted to copy and distribute copies of this text or any portion of this text. It may be incorporated in a larger work, and/or quoted from, stored in a database retrieval system, photocopied, reprinted or otherwise duplicated by anyone without prior notification, permission, compensation to the holder, or any other restrictions. All rights to this text are released to everyone and no one can reduce these rights at any time.

మావంగ్ వేసుడి

మూడవ పుస్తక్

విషయ సూచిక

1.	సికారి కియ్యల్	3
2.	తడ్డి	4
3.	పెర్నా పేన్ద పూజ	5
4.	దౌడ మాతెక్ గిర్ పుటుస్వల్	6
5.	ఖేతిదారల్ అని వోనెర్ నాల్విర్ కాండిర్	8
6.	సాడద్గ	9
7.	గాది అని కోమ్లల్	10
8.	చిహా, యెడ్జ్ అని కోమ్లల్: సమ్మిన్ గటల్ ఉమ్సర్ బద్?	11
9.	మొల్లొక్ పెన్నెతల్ కరితంగ్	12
10.	సంగోన్ లాసి మొసోర్ సొత్త	13

1. సికారి కియ్యల్

ఎన్. జే. లింకన్ (1969)



మా కోయ్తుర సికార్ కర్నవల్ ఇత్తై, సికార్ ఇహిన్ కర్నవల్. ఇద్ నాత్పేర్ సికారిత్ మీరె మాసి, నాట్నుంగ్ నెయ్క్క పియ్యి, కేడతె దాంతేర్. కేడతె సాంజి హాక కీసి మొల్లోక్ పూడంతేర్. అవేన్ నెయ్క్కనే పూడ్చి-పూడ్చు జక్కి అవేన్ ఉంది జాగ జమ కీంతేర్. జమా కీసి, అవేన్ తోల్ తెండంతేర్. తోల్ తెండ పజ్జ, తల్లంగ్ కాల్క్ బొడ్సాంతేర్. బొడ్సాత్కూర్కి అవేనంగ్ పొదుక్ మందంతంగ్. పొదుకున్ సప్పి నెయ్కున్ వాటంతేర్. మావక్, కుర్నకు, బేడ్కింగ్, రొహింగ్ సికార్ కీంతేర్. ఇవేన్ ఉంది జాగ జమ కీసి, అవేనంగ్ తోల్క్ తెండి, ఇరంతేర్, అని సవ్విసంగ్ ఈసంగ్ వాట్టి, బోనంగ్ వొహ్కా తూసంతేర్. తూసి, ఊర్ రొహ్కా పియ్యి వాంతేర్. అవేనంగ్ సీంక్, తోల్క్, రోన్ పియ్యి వాంతేర్. సీంకున్, గూరేనగ టాంగి కీంతేర్. అవేనంగ్ తోల్కున్, జప్పై వార్తింగ్, చప్పుల్క్ కియన్ లాసి, మాద్గూర్ గా సీంతేర్. మార్ధి తోల్కున్ గిర్ ఉంది రూపమ్మై తరంతోర్. ఉంది దుస్రా కామున్ ఉప్పోగ్నే వాంతంగ్. దహ్నా, కేడత్ రొప్పొ మల్క్ మందంతంగ్. మల్క్ పూడ్లై గిర్ దాంతేర్. మల్క్ పూడ్చి, అవేన్ గిర్ పియంతేర్. అవేనంగ్ పెజ్జెటంగ్ బూరంగ్ తెండంతేర్. అని రొహ్కా పియ్యి వాంతేర్. అవ్ బూరనంగ్ గుసాడి బోపింగ్ కీంతేర్. బోపింగ్ కీసి, డండారితగ గుసాడ్కూ ఆసి కెర్పి యేందంతేర్. ఇహిన్ మా కోయ్తుర సికార్ కీంతేర్.

2. తడ్డి

ఎన్. జే. లింకన్ (1969)



ఇంద్కే మావేర్ కేతి కియ్యలిర్ తడ్డిత వెల్లె పాయద యేతంతేర్. తడ్డి ఇంద్కే బారి ఇత్తైకే, ఇదు తడ్డిత దివొన్కొ-మంతంగ. కేతి బాడిత్ లాసి ఊర్ వహుక్కై జొగ్గింగ్ పియంతేర్. అగ్గ నర్క-పియాల్ తడ్డి కీంతేర్. ఊర్కున్ ముచ్చే కప్పింగ్ మనోంగ్, అదేన్ లాసి తడ్డి పొడ్డే పెసినల్ ఇరంతేర్ అని ఆర్సేర్ మందంతేర్. తడ్డి

సిల్వేకే, ఊర్కున్ పిని బయ్ వసంత. అదేన్ లాసి ఊర్ నర్క-పియాల్ తడ్డి కీసేర్ మందంతేర్. మొదోల్, మావేర్ కోయ్తుర్ జక్-మక్ పాందిర్. జక్-మక్ పాసి, తడ్డి ఆరూ సీందిర్.

జక్-మక్నే తడ్డి కీసి సయ్యాక్-పాసి కీసేర్ సాందిర్. జక్-మక్ ఇత్తైకే, ఉంది పొలాదిత టుక్కై ఖాతి తుంగంతోర్. ఉంది కేడతె గర్గోటి-బండ మందంత. అదేన టుక్కై యేచి, అని సప్రి-మరాత కాయన దూది తెండ్సి, తాన్ పాంతేర్. ఇవ్ మూందు ఉంది కీసి, తాన్ జక్-మక్నే తడ్డి అరు సీందిర్. తొల్లెత జమానతే రొప్పొ, జక్-మక్నే తడ్డి అరు సీందిర్. అని తడ్డింగ్ కీందిర్. ఇంద్కే హాన్ సెల్లె. ఇంద్కే సమ్మిర్ కున్ కిన్-డబీత సోక్ లాగ్త. సమ్మిర్ కిన్-డబీతే ఇంద్కే తడ్డి నిరు సీసేర్ మంతేర్.



3. పెర్నా పేన్ద పూజ

ఎన్. జే. లింకన్ (1969)

పెర్నా పేన్ద పూజ ఇత్తైకే, పూస-మహిన పెర్నా పేన్ద పూజ ఆంత. పెర్నా పేన్ద పూజత్ లాసి, సమ్మిర్ కుటుమ్మాలిర్ మీరె మాయన్ లాసి, నామ్కా-నామ్కా కటాడల్ ఖబూర్ సీంతోర్. కుటుమ్మాలిర్ బక్రంగ్ అని కొర్కొ పూజ కియన్ లాసి పియ్యి, కటోడన రోన్ వాంతేర్. కటోడన రోన్ వాసికున్, దుస్రా నేటి పేన్-గడతగ బక్రంగ్ అని కొర్కొ కొటుసి కొయ్యి పూజ కీసి, జేవున్ కీంతేర్. మర్ల పెర్నా పేన్ద సామన్ తెయార్ కీసి, పూజ కియన్ లాసి తెయార్ ఆంతేర్. పెర్నా పేన్దున్ వహూర్ దొహంతేర్, గాగ్రంగ్ దొహంతేర్, సల్లె తరంతేర్. సల్లె తచ్చి కున్, సమ్మి ఉంది జాగ కీసి, థోల్కొ, పేప్పెన ఆవజ్ కీంతేర్. ఆవజ్ కీసి, మర్ల సమ్మిర్ సారెసారె నిల్సి, కాల్కొ కెరంతేర్.

మర్ల కటోడన్ వడి వాంత. వడి వాతుార్ కీ, పెర్నా పేన్ పియ్యి, కటోడన్ రోన్ తరంతేర్. మర్ల పెర్నా పేన్ద యేర్ తచ్చి, పెర్నా పేన్దున్ నారంతేర్. సమ్మిర్ మిట్టన్ సీంతేర్. మర్ల పెర్నా పేన్ నార్ వెలిలెన్ పెసియంతేర్. నార్ వెలిసి కున్, పెర్నా పేన్దున్ రోమి-మరాత్ అగ్గ వోసి, ఉప్పున్ సీంతేర్. ఉప్పున్ సీత పజ్జ, ఉంది, రండ్, మూండ్ గంటనే పెర్నా పేన్దున్ గంగత్ రొప్పో యేర్ మిహ్లా వోంతేర్. వాజ-గాజతే సమ్మిర్ నాప్పేర్ మీరె మాసి, పెర్నా పేన్దున్ గంగత్ అగ్గ యేర్ మిహ్లా, తరంతేర్. తత్ పజ్జ, దుస్రా నేటి పెర్నా పేన్ద పూజ కియన్ లాసి, పేన్-గడతగ వోంతేర్. వోసికున్ , మొకుల్కొ నిలు సీంతేర్. పెర్నా పేన్దున్ మున్నె బక్రంగ్ అస్కాంతేర్. మర్ల జేవున్ సీంతేర్. పెర్నా పేన్ ఇత్తైకే, మావేర్ సమ్మిర్ కోయ్తుర డగూర్ పేన్ ఆండ్, ఇంజేర్ మానే-మాంతేర్. మాకున్ బార మహినంగ్ చొకొట్ ఇరాన ఇంజేర్. పెర్నా పేన్దున్ కాల్కొ కెర్సి, మర్ల పెర్నా పేన్దున్ తాన జాగతగ వోసి, ఇరంతేర్.

4. దౌడ మాతెక్ గిర్ పుటుస్వల్

కోమనే కీతోర్: పేందూర్ దుర్నుత్ రావ్ (భీముగూడ)

(1) దౌడ మాత గొరై

"హీన్ కేంజట్! బోస్గిర్ నూర్ గొరైంగ్ మత్తైకే అగటల్ ఉంది దౌడ మాత. ఉంది కమ్మి నూర్ గొరైంగ్ కేడతె సుట్టి కీసి దౌడ మాత గొరైత్ మహ్కాంతోర్. మహ్కాత పెజ్జె పుట్టంత. కూసితె గొరైత్ తన్వ సెటద్దా వాట్సి రోన్ వాసి తన్వైర్ సాప్తలిర్క, కరుమ్మైర్క కేయి, "మిమెట్ నా సంగ వరాట్ కూసితె మంట్ బారి ఇత్తైకే నావ దౌడ మాసి మత్త అద్ గొరై పుట్ట ఇంజేర్ ఊర్ వెప్తాన్. ఇహినే వొరోర్ మాయ్నల్, పాప్ కియ్యల్ సుట్సిని మల్సి వాతోర్. హాన్ ఆతెకే అస్కే పొరాడ పేన్దున్ గిర్ కూసి మంత. మాయ్నలిర్ బతి పాప్ కియ్యకి ఇంతేర్ పొరాడ పేన్దున్ కూసి సెల్లై."

(2) దౌడ మాత కూరత బిల్ల

ఉంది బాయిన్ కూరతంగ్ బిల్లంగ్ దహా మత్తంగ్. దహా తల్ ఉంది దౌడి కీత. బాయి డివ్వే నిరు సీసి కెయ్యడే సియ్యేర్ మహ్కాంత అద్ పుట్నల్ వేరి. చొకొట్ మహ్కాంత. అద్ పుట్ట పెజ్జె తానంగ్ సాప్తలిక్ కరుమ్మంగ్ కేయి, "నహ్కా కూసితె మంట్. నన్న దౌడి కీతోన్ అద్ కూరత బిల్ల పుట్ట" ఇహినే వొరోర్ మాయ్నల్, పాప్ కియ్యల్ సుట్సిని మల్సి వాతోర్. హాన్ ఆతెకే అస్కే పొరాడ పేన్దున్ గిర్ కూసి మంత.

(3) దౌడ మాతోర్ కాండి

వరోర్ మయ్నన్ ఇప్పిర్ కాండిర్ మత్తేర్. చుడూర్వాలె బతల్ ఇత్తోర్ బావన్ ఇత్తైకే? "బావ నా ఈస బచ్చోర్ వాంత, అచ్చోర్ సీమ్" ఇంద్క. ఇంజేర్ ఇత్తోర్, చుడూర్ కాండి. ఇన్నెకై బాబల్ బతల్ కీతోర్ ఇత్తైకే? వోన్టల్ ఈస తూసి సీతోర్, చుడూర్ కాండిన్.

అగ్గ రోన్ రండ్, మూండ్ రోచ్క్ మంజి సమ్మి జాయ్త్ వోంతోర్. వోసి దుస్రా దేత్సెకై సాడితోర్. అగ్గ సాంజి కొత్తంగ్ నాసి కీతోర్ మనల్ వేరి

తందూర్ బయ్ చొకొట్ మందూర్. ఇహినే మనకే-మనకే అయింత కొత్తంగ్ మార్తంగ్. మల్ల అద్ దేశమ్మగ పిర్ వాయ్కుకి, పంటంగ్ పండ్యకి బతయ్ సెల్లె బయ్ కరు అర్త, వొన్గిర్ బయ్ కరు అర్త. వొరోర్ అద్ దేశమ్మగ మాయ్ననగ సొత్తోర్ వోర్ వేన్ గడియల్ ఇర్తోర్. పద్దింగ్ మెహ్లా వాప్టె రొప్తోర్. "పద్దింగ్ తిన్వల్ పొట్ గిర్ నన్న ఇంకే, తింద పరన్ తోన్" బతి నాకున్ బోరే గాటో బతయ్ సియ్కుకి.

మల్ల వోర్ హేతు కీతోర్, "నావోర్ బాబనగ గడియలిర్ కామ్ కీసి బయ్ చొకొట్ తింతేర్ నన్న ఇగ్గే కరుతె సాసేర్ మంతోన్. నన్ ఇంకె నావ దేశ్నెకె సొంజి మావోర్ బాబనగ దాక. అగ సొంజి బాబ నన్న పొరొడ పేన్దున్, నీక్ నన్న పాప్ కీతోన్ ఇంకే నీవోర్ కాండి ఇంజేర్ ఇన్లెక్ గిర్" సెల్లోన్ నాకు నీవోర్ వొరోర్ గడియన్ దాత్ ఇరా" ఇంజేర్ ఇన్కు.

మల్ల తెహ్చి వోనోర్ బాబనగ సొందన్ సాటి పెసితోర్. రోతున్ లజ్జె కాండి మత్తోర్. బాబల్ నూడ్చి అడ్సేర్ కాండినగ విచ్చెర్ సొత్తోర్, కలితోర్, తొడ్చి బుర్తోర్. "బావ నన్న పొరొడ పేన్దున్, నీక్ నన్న పాప్ కీతోన్. ఇంకే నీవోర్ కాండి ఇంజేర్ ఇన్లెక్ గిర్ సెల్లోన్." కాండి ఇత్తోర్.

బతి బాబల్ గడియలిర్కున్ కేయంతోర్. కేయ్చి, "వెయ్చె చొకొట్చి అంగే తరట్ రా. కెరుసీంట్ కెయ్చి బొటతగ ముద్ద కాల్కనగ చప్పుల్కె కెరుసీంట్. ఉంది డగూర్ బక్ర తరట్, కొయ్చి తిన్కుట్, అని కూసితె మన్కుట్ బారి ఇత్తెకే నావోర్ కాండి సొందూర్ బతి పిస్సి వాతోర్, దొడ మాసి మత్తోర్ బతి పుట్తోర్" ఇంతోర్. ఇవు సమ్మి గడియలిర్కు వెహ్చి తిన్వల్, యేంద్యల్ సమ్మి సురు కీతేర్.

అస్కే అహన్ ఆసేర్ మన్నెకే డగూర్ దాదల్ వాప్టె మత్తోర్. వాప్టల్ వాత పెజ్జె డమ్కె, థోల్కె, పేప్రెంగ్, పాసేర్ యేందంతేర్. అవ్ కేన్చి వరోన్ గడియన్ కెయ్తోర్. గడియన్ కేయ్చి పూసి కీతోర్ బారి "ఇదు బతల్ హిన్ కీంతిట్?". గడియల్ బతల్ వెహంతోర్ ఇత్తెకే? "నీవోర్ తమ్ముర్ మల్చి వాతోర్. వాతోర్తే డగూర్ బక్ర కోయ్తోర్ బారి ఇత్తెకే వోర్ చొకొట్ మంతోర్.

ఇవు సమ్మి కేంచి డగూర్ దాదల్ బయ్ సాంగున్ వాతోర్, రోన్ గిర్ సాన్ముకి. వోనోర్ బాబల్ రొప్పొడల్ బహ్రా వాసి కాండిన్ బయ్ కోసిద్ కీతోర్ "రొప్పొ వా-వా" ఇంజేర్. బతి కాండి హీన్-హీన్ ఇత్తోర్ "బయ్ అస్కెడల్ నన్ను సీసాటి గడియన్ దాత్ కామ్ కీంతోన్. నిమ్ వెహ్లాప్ నన్ను హాన్ కీందున్. బతి నావుర్ సోప్తలిర్ సంగ నాకున్ తిన్లై కొర్ పిల్లగిర్ తిన్లై సియుకి. వోర్ సీవోర్ దుస్రా కాండి లాంజెన్ దాత్ కొత్తంగ్ నాసి కీతోర్ వోర్, కాండి వాతెకే నిమ్ వోన్ సాటి సమ్మిన్ డగూర్ బక్ర కొయుస్త".

బాబల్ బతల్ ఇత్తోర్ ఇత్తెకే? "కోకో, నిమ్మె బస్కెట్ గిర్ నాహ్లాన్ మందంతి అని ఇద్ సమ్మి నావయ్ ఇద్ సమ్మి నీవ గిర్ ఆంద్. ఇంకే జేవున్ కియ్యువ్ మంత అని కూసితె మంతోం. బారి ఇత్తెకే సీవోర్ తమ్ముర్ సాందుర్ బతి పిస్సి వాతోర్, దొడె మాసి మత్తోర్ బతి పుట్టోర్.

5. ఫేతిదారల్ అని వోనెర్ నాల్విర్ కాండిర్

తెలుగుతల్ కోయనే కీతోర్. వేందూర్ దుర్నత్ రావ్ (భీముగూడ)

భారు ఫేతిదారన్ నాల్విర్ జన్కె కాండిర్ మందంతేర్. ఊర్ తమ్మ్య-తమ్మె బస్కెట్ జగ్గంగ్ కీసేర్ మందంతేర్. భారు మాయ్నల్ ఊర్కున్ బహ్నె బతి మీరి కియన ఇంజేర్ వోన్ దిల్లగ మంత బతి అద్ గొహ్ని వోన కరల్ ఆయుకి.

ఉంది దియ్య, వోర్ ఫేతిదారన్ చొకొట్ లాగ్వత మీండి మత్తోర్. ఊర్ నాల్విర్ జన్కె కాండిర్ వోన కటుల్త్ కరూం నిల్సి మంతేర్. అస్కె వోర్ బాబొ ఊర్కున్ ఉంది కట్టె కోలన వొజ్జె సీసి. ఉరుసట్ ఇత్తోర్. సమ్మిర్ కాండిర్ అద్ వొజ్జె ఉరుసన్ సాటి అంతేర్. బతి ఉరుస పర్మకి. అస్కె వోర్ బాబొ అద్దె వొజ్జెతల్ ఉంది-ఉంది కట్టె కోలంగ్ ఊర్కున్ సీసి. ఉరుసీంట్ ఇత్తోర్. ఊర్ కట్టెచుటుక్కె ఉరుస్తేర్. అస్కె బాబొ కాండిర్క సూడ్సి, అరేయ్ కాండిర్! మీరె మాసి మన్వల్ కీమ్. మిమెట్ సమ్మిర్ ఉంది ఆతెకే బోరే మీకున్ వెరుసూర్. ఇద్ కట్టె కోలత్ దాత్ మిమెట్ బోన వోర్ మత్తెకే ఆగం ఆసి దాంతిట్ సూడట్ ఇంజేర్ వెహ్లార్.

6. సాడ

వేందూర్ దుర్భత్ రావ్ (భీముగూడ)

మాకున్ మావుర్ బెయే-బాబల్ మాకున్ సర్కారి సాడతె వాటంతేర్. మొమొట్ మావ నాటే బార కడి యెప్పల్ కరుసీసి మాకున్ మల్ల మావోర్ సార్ ఉంది తరగతిత పుస్తక్ నగ వాటంతోర్ ఉంది సాల్ కరియంతోం. ఉండే దుస్త్రా సాల్ రెండు పుస్తక్కుగా వాటంతోర్ మొమొట్ అద్ సాల్ గిర్ కరియంతోం. మల్ల మూండ్ పుస్తక్ కర్యన ఇత్తైకే మల్ల జర్ల డగూర్ సాడద్గ దాయన దుస్త్రా నాటే తెలుగు, హింది, లెకంగ్, ఇంగ్లిష్, మాకున్ వడ్కై లెహికియే వాయొంగ్ బతి మాకున్ మావోర్ సార్ అద్ సాడద్గ వోంతోర్. అగ్గ బోరే నాపన్ ఆంతేర్-బోరే పాస్ వాంతేర్ నాపన్ ఆతుర్ ఊర్ రోన్ వాంతేర్. మల్ల ఊరుర్ బెయ్యె బాబల్ బోరే సారదున్ పియ్ని దుస్త్రా సాడద్గ దాంతేర్ వోసి నేరిక్ కీంతేర్ కాండిన్. బోరే రోన్ కామ్ కియై కాండిన్ మాన్ ఇంతేర్.

సర్కారి సాడ మూండ్ పుస్తక్కుల్ తే దహ పుస్తక్ వేరి కరివలిర్ కాండిర్క సర్కూర్ తల్ పెరేక్, డారి, నియ్, లసున్ కమ్మ, ఉల్లింగ్, సబ్బున్క, సామన్ ఇరై సందొక, పుస్తక్ కాపింగ్, దెడే, చంబు, దుపాటి, కప్పింగ్, భూట్క, ఇవ్ సమ్మి సర్కూర్ తల్ సాడతే వాంతంగ్. కరివలిర్ కాండిర్క వార్దన్ సార్ సీంతోర్, నేరిక్ ఆతేర్ ఊర్ కాండిర్ మూండ్ పుస్తక్, నల్ దహ పుస్తక్, వేరి కరియంతేర్..


మల్ల దహ పుస్తక్ నగ వెల్లేటిర్ కాండిర్ నాపన్ ఆంతేర్, కమ్మి కాండిర్ పాస్ వాంతేర్. పాస్ వాంతేర్ ఊర్ కాండిర్, అక్రవి, బారవి కరియన్ సాటి తంవంగ్ దహవి పాస్ ఆతంగ్ కాగుత్క అక్రవి సాడద్గ సీంతేర్. మల్ల ఉంది సాల్ అక్రవి, ఉంది సాల్ బారవి రెండ సాల్క కరియంతేర్. వెల్లేటిర్ కాండిర్ నాపన్ ఆంతేర్, కమ్మి కాండిర్ పాస్ ఆంతేర్. ఉండే నాపన్ ఆతేర్ ఊర్ పరీక్ష పీజ్ దొహంతేర్ మల్ల పరీక్ష లెహి కీంతేర్. నాపన్ ఆత అద్ అక్రవి ఆయి, బారవి. పాస్ ఆంతేర్ ఊర్ తేరవి చొదవి, పంద్రవి. కరియన్ సాటి (డిగ్రి) సాడద్గ దహవి, అక్రవి-బారవి, పాస్ ఆతంగ్ కాగుత్క కాలేజ్ నగ

సింతేర్. మల్ల ఉంది సాల్ తేరవి, చౌదవి, పంద్రవి. ఇవు మూంద్ సాల్క కరిసి వెల్లేటిర్ కాండిర్ నాపస్ ఆంతేర్, కమ్మి కాండిర్ పాస్ వాంతేర్. మల్ల సర్కార్ తల్ నావకరి పుట్టంత, బోనే, బోరే రోన్ కేతి కామ్ కింతేర్. బోరే లారీ నగ ఆదిలాబాద్, కరింగగర్, హైద్రబాద్, బొంబై, డగూక్-డగూక్ సీటింగ సాంజి బద్దే ఆయి కామ్ కింతేర్. మావ కోయ జాతి బయ్ పెజ్జె మంత, మందస్ సాటి చొకొట్టు రోన్ మన్నో, కెర్లె ఆంగ్గే మన్నో, తుంకా ఇత్తైకే వాపుర్ మన్నో, పియ్యూ ఇత్తైకే కోందంగ్ మన్నోంగ్. ఇహిను మా జాతితగ వెల్లేటిర్ పెజ్జె మంతేర్. 'మావ దేశం నోర్ ముఖ్యమంత్రి చంద్ర బాబునాయిడు' 'అక్షర-జ్ఞానం, నర్కక్ సాడ కరియన ఇంజేర్ టెండ్తోర్. మడూర్ డగూర్ సమ్మిర్ కరిసి మున్నె వాయన. పెర్నా బొట్టా సాయ్ తగ నహ్చా కాగుత్తుగ అడుంవ తన్వ పొరోల్, పాడి లెహి కియన. సర్కార్ తల్, పాటింగ్-పుస్తక్ నార్ నాబే రొప్టోర్ కరివలిర్ తంవంగ్ పొరోల్క, పాడింగ్ కరితేర్ ఇంకే బవే దరఖాసు నగ గిర్, పొరోల్ వాటంతేర్.

7. గాది అని కోయలల్

తెలుగుతల్ కోయనే కీతోర్: వేందూర్ దుర్నత్ రావ్ (భీముగూడ)

ఉంది జోక ఉంది గాది కేడతె సాంజి, ఆరామ్మే సాంతితే జాడి యేయ్ని డగూర్ మర్ల బూడ్ పట్ని మందు. ఉంది దియ్య ఉంది కోయలల్ గాదిత్ సూడ్ని ఇంత " నన్న బహ్నె బతి ఇద్ గాదిత్ తిందాన" ఇంజేర్ కరికీత. కోయలల్ గాదితగ వాసి ఇంత "సోప్త! నీక్ సూడ్ని ఆబ్ రోజ్కే ఆంత. "బారి? ఇంజేర్ గాది ఇత్త. గాది కరికీత కోయలడ బుద్దిత్, గాది ఇంత "సోప్త! నన్న చొకొట్ సెల్లోన్, నావంగ్ కార్కనగ బయ్ డగూర్ మార్ లాక్కి మంత. అద్ బయ్ నోసెర్ మంత" ఇంత అద్ టుగ్రి కోయలల్, డెంగల్ గాదితంగ్ గొప్టింగ్ నమ్మి అద్ ఇంత "సోప్త! వెరిమ? నన్న వైదున. ఆందున్ బేంద్ నీవ కాల్ తోహ. నీవ కాల్ చొకొట్ కీంతోన్" ఇంత. గాది ఇంత "అద్ మార్ నా కాలదున్ నడ్డుం మంత సూడ" ఇంత. యెడ్డి కోయలల్ కరూం సాంజి పెజ్జె కార్కనగ సూడ్. గాది బచ్చోర్ జోర్ మత్త అచ్చోర్ జోరై లాత పాత. కోయలల్ బూకె మాసేర్ బూడ్ అర్త, గాది పసి కిసి విచ్చెర్ సాడిత.



8. చిహ్వా, యెడ్జ్ అని కోయ్లల్: సప్టన్ గటల్ ఉయ్సర్ బద్?


తెలుగుతల్ కోయనే కీతోర్: వేందూర్ దుర్నత్ రావ్ (భీముగూడ)

ఉంది కేడతె చిహ్వా, ఉంది యెడ్జ్ పిస్సెర్ మందంతంగ్. అవ్ రెండ బదెనే వెరివక్ రెండుతే బరో బర్ మందంతంగ్. ఉంది దియ అవ్ రెండ జన్వర్క ఉంది హెరైత్ సూడ్తంగ్. తాన్ జివ సెల్లె. అస్కే చిహ్వా ఇంత "నన్న ఇద్ కేడతోర్ రాజాన నన్న ఇద్ హెరైతున్ తిస్క" ఇంత. అద్ కేంచి సోంగ్నె యెడ్జ్ ఇంత. "ఇద్ కేడతోర్ రాజాని నిమ్మె ఆయ్యి కీ చిహ్వా, నన్న నీకున్ వెరుసంతోన్, నన్న అద్ హెరైతున్ తిస్క" ఇంత. అవ్ రెండ జన్వర్క తెలియన్ సాటి తెయార్ ఆతంగ్. ఉంది కోయ్లల్ అవేన్ సూడ్చి కరి కీత, చిహ్వా, యెడ్జ్ తెలిసి-తెలిసి హట్టె మాతంగ్ ఆరం యేచ్చెర్ మంతంగ్. సప్టె కోయ్లల్ హెరైతున్ వాసి మత్త తింజి యేత. చిహ్వా, యెడ్జ్ తాన్ కరికీతంగ్, బతి అవ్ నారజ్జే! అవేన్ తప్పన్ అవ్ కరి కీతంగ్. చిహ్వా ఇంత "మాకున్ బుద్ది సెల్లె. మరట్ ఉందిత్ ఉంది తెలితట్, అద్ హెరైతున్ కోయ్లల్ తిత్త. మరట్ తాన్ బతయ్ కియ పర్వట్".

9. మొల్లోక్ పెన్నెతల్ కరితంగ్

తెలుగుతల్ కోయనే కీతోర్. వేందూర్ దుర్నత్ రావ్ (భీముగూడ)


ఉంది కేడతె ఇహిన్ - - (దహా,బార) మొల్లోక్ పిస్సెర్ మందుంగ్. అద్ కేడతె చిహాంగ్, డువలిక్, కోయ్లలిక్, ఉండే కేడతంగ్ జన్వర్క పిస్సెర్ మందుంగ్. అవెకున్ సూడ్సి మొల్లోక్ వెరిసి అవేనంగ్ పర్పనల్ బహ్రా పెసివక్ వెరిసెర్ మందుంగ్. ఉంది దియ అవ్ మొల్లోక్ ఉంది పెర్నా మర్తల్ బూడ్ పంచాద్ ఇర్తంగ్. డగూర్ మొల్లోక్ "మరట్ గట్కు-గట్కుత్ వెరితెకే పిస్స పర్వట్. మాకు సాంతి సెల్లె. బహ్రా వాసి చొకొట్ కర్న పర్వట్. వెరివక్ తింజి మంద పర్వట్. మరట్ బత నేరోతుర్, పిసలిర్ దాత్. మరట్ బతల్ కీకట్? " ఇంజేర్ సమ్మి మొల్లోకున్ పూసి కీంత. అవెన్ రొప్పొఉంది డొగ్గి మొల్లోల్ "ఇహిన్ పిస్వల్ కామ్ సియో. మరట్ సమ్మియ్ సాకట్." ఇంజేర్ వెప్తా. "హానే చొకొట్. సాయన్ సాటి బతల్ కీకట్. మరట్ ఉంది కుహితగ డెహ్కాతెకె జీవ సుట్టి కీంతట్" ఇంజేర్ మొల్లోల్ వెప్తా.



అస్కే మొల్లోక్ ఉంది కుహితగ సొత్తంగ్. అగ్గ బయ్ పెన్నెంగ్ కుహితగ బొవతల్ డాట్ మందంతంగ్. మొల్లోకున్ సూడ్సి పెన్నెంగ్ వెరిసి కుహితగ డెహ్కాంతంగ్. యేతగ నడయంతంగ్. డగూర్ మొల్లోల్ అదేన్ కరికిసి "మరట్ డువలికున్, కోయ్లలికున్ వెరియంతట్. అహ్నా మాక్ సూడ్సి పెన్నెంగ్ వెరితంగ్. మరట్ సాయ్వట్ మల్సి మా జాగతె దాకట్." ఇంజేర్ వెప్తా. మొల్లోక్ అవేనంగ్ జాగనె సాంజి చొకొట్నె సుక్కే అద్ నేటితల్ అవ్ కూసితె పిస్సెర్ మందంతంగ్.

10. సంగోన్ లాసి మొసోర్ సొత్త

మదావి లక్షిమణ్ (దుబ్బిగూడ)



ఆడ్ మాడ్సో గరిబ్ మత్తెరు ఆడ్ మాడ్సో గరిబ్ మత్తెకే, ఊర్కున్ పొండెక్ ఉండే వెల్లె తంగ్ మత్త, కప్పిత. తే, మాడ్సో బగ్గన్ సొత్తెకే? వోర్ పోండిన్ దాయన బయోక్కా రొప్పో తాటి కెప్పి కున్ రొప్పో మందన. ఆతల్ తంగ్ మత్త. ఆతల్ తంగ్ మన్నెకే బతల్ కీత కీ? ఉంది దివొన్ ఈతలే పోర్ గరమ్ వాత, దివాడిత మహిన వాత, "ఇంకె డండారి పలనా సిర్పూర సొన్వల్ మంత" ఇంజెక్ ఇత్తెకే. సొంజికున్ వాతెకే మంగ్ "బతల్తేర్ ఆయర్" ఇంజేర్ ఇత్తెకే. అవ్ సంగోక్ సంగోక్ మత్తంగ్, తాన్ సొప్తలిక్. తాన్ సొప్తలిక్ సంగోక్ మత్తెకే బతల్ ఇంతంగ్?

"సంగో! నాడి సొన్వల్ మంత సిర్పూర డండారి మావ కోయ మావ వెయ్యె డండారి, దాకట్?" "బతతున్ సంగో నన్ వాక నాకున్ పోడ్కా ఇత్తెకే కప్పి సెల్లె, కెర్కా ఇత్తెకే జొంపర్ (వోరి) సెల్లె, (బతయ్ డాగ్-డాగ్గిన) సెల్లె", ఇంజెక్ ఇత్త, గరిబ్ మాయ్నన. "నాకున్ సోకకా ఇత్తెకే నియ్ సెల్లె, ఊడ్కా ఇత్తెకే పడ్య సెల్లె", అవోచ్చర్ హోలత్ వెహ్నెక్ తేర్ సంగోక్ జులుం కీతంగ్. సంగోక్ జులుం కీతంగ్ కీ "సంగో సెల్లె! నన్ను నీకున్ పడ్య నియ్ సీంతోన్" ఉంది సంగో ఇత్త. ఉంది సంగో ఇంజెక్ ఇత్త. "సంగో నన్ నీవ తల్ల నొరంతోన్." ఉంది సంగో ఇంజేర్ ఇత్త "నన్ను జొంపర్ సీంతోన్." ఉంది

మావంగ వేసుడి

సంగో ఇత్త కీ "నన్న దిక్కి సీంతోన్." ఇంజెక్ ఇత్తైకే ఉండే బతయ్ పోతియ్ గట్టి దుస్రా సంగోక్ సమ్మి కీతంగ్.

అచాన్ కీసికున్ కూన్ కీసికును తమ్ వోతంగ్. సొత్తంగ్ అని అంటితే యేంతంగ్. మాన్-పాన్ కీతంగ్ సిర్పూరతున్. అని సిర్పూర తోర్ భగవన్ షావ్ వోర్ అవెకున్ ఆర్తి అవెక్కా మాన్ పాన్ చెహ-పాని సమ్మి కీతోర్.

అని మర్ల బతల్ ఆతకి? మర్ల సార్ ఆతంగ్. సార్ ఆతంగ్, రోన్ వాతంగ్. రోన్ వాతంగ్, రోన్ వానెకే తోడా సికాటి మన్కొ అర్త. ఇనెకెనె బతల్ కీతకీ ఇద్ బాయి? బదెన అదెన్కును పోతి గట్టి, కడెంగ్ వెర్కు బద్దెనంగ్ అదెన్కు వాపస్ కీసెక్ వాసేర్ మంత. తే దిక్కి వాలే బాయిన, దిక్కి అద్ సంగోన దిక్కి వోతకీ "యే సంగో! ఇద్దె నీవ దిక్కి" ఇంజెక్ ఇత్తైకే. "అగా వాటా! కుటతగ." ఇంజెక్ ఇత్తైకే. అద్ అయింత హెర్మి కుటతగ వాట ఇంజెర్ ఇత్తైకే హెర్మి కుటతగ వాట్.

వాట్టైకే అద్ద హెర్మి మత్త దిక్కితున్ తింజి మహ్తా, హెర్మి. హెర్మి తింజికున్ మహ్తా. ఇద్ తన్వ దందతె రొప్పోనే రొప్పో రెహ మాత. దిక్కి వాలే బాయి. దిక్కి వాలే బాయి తన్వ దందతె తనయ్ రెహ మాత, దిక్కితున్ మత్త హెర్మి తింజి మహ్తా.

అని మర్ల దుస్రా నేటి ఇంత, "యాయ పలనా వోర్ దాదన బాయ్కో వోత దిక్కి నావ తరాయే." ఇద్ బక్వ (లొల్లి) కీసెక్ మంత. "యాయ దిక్కి సీతోన్" తే మాడోన్ కేంజ్తోర్, అద్ బక్వత గొట్టా దిక్కిత. "దిక్కి నావ సీచితే, దిక్కి హక్కెన్ పొండ్లె సీతోన్ తే దివాడితున్ హక్కెన్ కీత." ఇదు నాచెన్ రొప్పో సమ్మిర్క చర్ప కీత కీ వోర్ మాడోన్ సోంగ్ వాత.

మాడోన్ సోంగ్ వాతెకే మాడోన్ దుడ-దుడ పాతోర్. పాతోర్ అని కూబ్ పాతోర్, కూబ్ పాతోర్, కూబ్ పాతోర్. కూబ్ పాతోర్ ఇంజెక్ ఇత్తైకే తాన్కున్ తాక వాయ్యక్కే, తాన్కున్ మెలియ వాయ్యక్కే పాతోర్. పాతెకే, బతల్ కీత కీ, దహ్నా హక్కె కార్క్ పియ్తోర్ యెరిసేర్ హక్కె పొదితగ వోసి వాడ్ సీతోర్.

వాతోర్ కీ టాటి ఉమ్మి దొహ్తార్ కీ రోత్ రొప్పో మింటార్. రోత్ రొప్పో మిండనెకెనే ఇద్ మత్త ఆడ్సి-ఆడ్సికును. అని మర్ల కొరిసేర్-కొరిసేర్ జమ్మి-జమ్మి పిర్ వాసేక్ మత్త, పిర్ డెమ్. పిర్ వానెకే కొరిసేర్-కొరిసేర్ సాత్త. అని నాటేన్ మారయి ఆవాల్ మత్త. మారయి ఆవాన గుడ్సె మత్త. అద్ గుడ్సె తగ సాంజికున్ ఉత్త. గుడ్సెతగ సాంజి ఉద్దుకెనే, తే బతల్ ఆత ఇత్తకే? వీసా జన్క కల్లర్ వాసెకె మంతేర్. కల్లర్ కల్లె నమ్కా నమ్కా లూటి కియ్యె. తే వాతెకే గుడ్సె దిస్తా, కల్లర్ కున్. కల్లర్ కున్ గుడ్సె దిస్సెకేన్ "అరేయ్! ఇగ్గే పేన్ మంతరేయ్ పేన్ మంత" ఇంజికున్, "పేన్ మంత", ఇంజికున్ అద్దు పేన్దగ. "కాల్ కెరట్! కాల్ కెరట్!" కాల్ కెర్సెకే మంతేర్. "తే బహన్ కాల్ కెరకిట్ రా?" "అరేయ్! సిల్లే, మావ సికారి సాదే మాయి, మా సికారి సాదే మాతెకే నీకున్ కొడాప్-కొడాప్ రుప్యంగ్ పావ్ దొస్కొం." ఇంజెక్ ఇంతేర్. అని కాల్ కెర్సేర్. కాల్ కెర్సికున్ సాత్తెకే మర్ల అద్ అగన్ ఉచ్చికున్ మంత అద్ బాయి.

అని ఊర్ హక్కె సాంజి ఊర సాదే మాత సికారి. అని తాదొంగ్ అవొక్ గట్టి దొహ్చి తత్తేర్, ఈతంగ్. హో, రుప్యంగ్. రుప్యంగ్, చాంది, సోనే, అని బెరెంకీ వాతేర్. "మంత పేన్ రా నూడేర్ ఉచ్చిన్ మంత బాయి. "హేయ్! మంత, మంత!" ఇంజెక్ ఇత్తెకే. మర్ల బతల్ కీతేర్ కీ? హో... దొస్తేర్ కొడాప్-కొడాప్ రుప్యంగ్. అని సిల్లెతే కర్కనె మొసోర్ కొయ్యి సాన్వలిర్ మత్తేర్. "సికారి సాదే మాతెకే బేసు కొడాప్-కొడాప్ రుప్యంగ్ దొస్కొం. సికారి సాదే మాయవెకే కర్కనె మొసోర్ కొయ్యి దాకోం." ఇంజి మత్తేర్. ఇంజెక్ ఇత్తెకే ఆ... రుప్యంగ్ దొస్తేర్ కొడాప్-కొడాప్ రుప్యంగ్ దొస్తేర్, అని సాత్తేర్.

మర్ల పోడ్డే పెసిసెర్ వాత గొగ్గి కూస్తా. బాయి బతల్ కీత? ఫాట్ క్యల్-తూట్ క్యల్ దిక్కి, తాన్ గ నాలుంగ్ గడ్డంగ్ రుప్యంగ్ వోటి కీత, అని కొరిసేర్-కొరిసేర్ రోన్ సాత్త.

"యేయ్ తేద!" మాడ్సోన్ ఇంత. "యేయ్ తేద! యేయ్ తేద! యేయ్ మాన్య తేద!" "హాట్! సాడ్యా హక్కెన్ నీ బహిన్ మాయిచ్చె. వాడ్సి తోన్ అగ్గ వాడ్సి తోన్." ఇంతోర్. "సిల్లే నన్ బయ్ వెల్లె తత్తోన్." బయ్ వెల్లె తత్తోన్

మావంగ వేసుడి

ఇనెకేన్ తొబ్బు జీవ ఇత్త వేన. "అని బతంగ్ తచ్చి మందర్ రా బహిన్ మాయిచ్చితే, నన్ తే యెరిసి వాట్తోన్ బతి" ఇంజెక్ ఇత్తోర్ అని వాసికున్ వెయ్వియ్ తాటి తెరిసి సూడైకే. తిర-తిర, తిర-తిర తాన వోటి మెన్ రుప్యంగ్ దిసంతంగ్.

రుప్యంగ్ దినెకెనే తాన్క చంగ్నె తహ్మాడతే రొప్పో వోసికున్ రొప్పో ఉప్పు సీతోర్. "ఉండే మంతంగ్ సాన్" ఇంజెక్ ఇత్తైకే. మల్ల తాన్ రొప్పో ఉప్పు సీతోర్. అని మల్ల విచ్చెర్ సాంజి మల్ల నేలతె ఉడ్పసి అవ్ రుప్యంగ్ తత్తోర్.

మర్ల హోటుం వాత, మావ జైనూర్త. జైనూర్ హోటుం వాత, బస్తర్ వార్ దినం హోటుం సొత్తోర్. తాన్కున్ దిక్కింగ్, జాంపర్, తనవ్వుకున్ దోత్రె, నేల, ఆంగ్గే, పాగోట, తత్తోర్. తే మర్ల బతల్ కీతోర్ కీ? తత్తోర్. మర్ల తాన గిర్ ఉన్నె దిక్కి మత్త. అద్ దిక్కి హెర్మి తిన్నే దిక్కి. అద్ హెర్మి తిన్నే దిక్కితల్ తాన బది దిక్కి, అద్ గిరే తత్తోర్.

మంగ్ పూన దిక్కి పోంటా బాయి. మంగ్ దుస్రా నేటి సక్రే, తాన దిక్కి "యే సంగో! ఇద్దె సంగో, దిక్కి నీవ అద్ హెర్మి తిత్తతే తినిగిర్ బతి ఇదే నీవ పూన దిక్కి." తేన అయిన్ సంగో మత్త, అద్దే సంగో మత్త, దిక్కి వాలే వెల్లెపెరెం మత్త. మంగ్ అంటితల్ లుబ్బ అర్త. అని బతల్ ఇంత? "సంగో బేందక్ బహన్ సుద్దె మాతిట్ సంగో," తాన్ జొక్-జొక్, జొక్-జొక్, జొక్-జొక్ తాన్ కున్ పూసి కీసెక్ మంత.



"బతల్ కీక సంగో? హిన్ కీతిట్ సంగో, నాకున్ హిన్ లుబ్బ కీతిట్? నాకున్ బెరెంకీ డండాారి యేందె దాకట్ ఇతిట్, వోతిట్. నన్ తచ్చికున్ వాట్టోన్ నీవ దిక్కి ఇమన్దరి తే కరలెన్ హెర్మి కుటతగ, హెర్మి తింజి మహ్తా. నిమ్ బద్దే మాతి సంగో తాన్ లాసి మీ దాదల్ నాకున్ కుట-కుట జహ్తూర్, తాక వాయ్వక్కే, కొరిసేర్-కొరిసేర్ సాత్తోన్, మారయి అవ్వన రోసు. అగ ఉత్తేకే వీసా జన్క కల్లర్ వాతేర్. 'సూడ హా పేన్ది నొమొట్ నేండు సికారిత్ దాంతోం మా సికారి సాదే మత్తేకే బేసు అద్ సికారి సాదే మాతు తే కొడాప్-కొడాప్ రుప్యంగ్ నీకున్ పొడు దొస్కొం. అద్ సికారి సాదే మాయ్విక్ దాయర్ తే నీవ కర్కనె మొసోర్ కొయ్సి దాకోం. ఇంజేర్ కాల్ కెరతెర్ సంగో ఊర సికారి సాదే మాత తచ్చికున్ కొడాప్-కొడాప్ రుప్యంగ్ పొడు దొస్తేర్."

తే తేన మందే నింత, ఇద్ సంగోన. ఇద్ సంగో బతల్ ఇంత? చొకొట్నంగ్ వెహంతోర్ మాడ్సో మస్త మిల్ జిల్కె మన్వలు, మస్త మీర్ మాసికున్, కౌసి కోర్పికున్, బతి సూడ తాన బుద్ది ఆవుట్ ఆత.

"యేర్ తోర హేయ్?" ఇంతోర్. "తోర్పి తుంగ్తెకే ఆయ్మో?" "హు, బతల్ మందర్ దోత్రే తరహా?" "వోసి పొడ్డెకే ఆయ్మో? నీక్ ఉండే-ఉండే దుస్తా

మావంగ వేసుడి

పహజెల్." హిన్ ఇంజెక్ మంత. "ఇద్ బారి దిహిన్ ఇంజెక్ మంత నేండ్ బతల్ ఆత నీకున్" పిల్ల-పిల్ల రాంగ్ నెక్ మంతోర్. తేర్ బతి ఇద్ తన్వయ్ డాకినెక్ మంత. "రాండెన్ ఆసా పాక" "హా, హా పాయ్యుల్ తేర్ బంటిన్ పాబిలార్ బతి నేండ్ వట్టి ఆగయ్ పాక" ఇంతోర్. "కూబ్ పాయ్యుల్ హా పాసితే బంటిన్ సూడ్సిలార్ గిర్ బతి తాదొన్ వకత్ నె" ఇంత. వేన్ కున్ ఉండే ఇచ్చున బుగ్గు సోంగ్ వాత, సాత్తోర్ తాపడ్-తూపడ్ ఉంది రెండే తాప్టంగ్ పాతోర్. పానెకెన్ "హా హా మందర్ ఇన్ని, హా నన్న పెల్కెలె మందంతోన్" ఇంజెక్ ఇత్తకి కుక్కె పెసిసీ సాత్త కీ, మారయి అవ్వన రోన్ సాంజి ఉత్త, కాల్ బటింగ్ దొస్సి.

అంటిత్ ఉండే పేరి అర్త బిచెర్యలీర ఊర్ కలీర, అంటిత్ ఉండే వాతేర్. "హా, అంటిత్ పేన్ మందర్ సూడట్ రేయ్? పేన్ మందర్ సూడట్ రేయ్?" ఇంతేర్. వీసా జన్క కల్లర్ "హా, హా! మంత, మంత!" ఇద్ ఉచ్చి మంత కొక్ నే, "మంత, మంత, హా. సూడహా పేన్ ది! నేండు నొముట్ తే సికారితున్ దాంతో. సికారి సాదే మాతుతే బేసూ, కొడొప్-కొడొప్ రుప్యంగ్ నీకున్ పాడు దొస్కో. అని సికారి సాదే మాయ్యుక్ దాయర్ నీవ కర్కెనె మొసోర్ కొయ్యి దాకో" ఇంజెక్ ఇత్తేర్. అని సాత్తేర్ హక్కె.

సాత్తేర్ హక్కె పార్ హక్కె పార, గాల్లి, డబులి,, రాసిమెట్టంగ్, బూసిమెట్టంగ్, జామ్మింగ్, పొలసంగ్ దహన్ వెలిసెర్ వాతేర్, బగనే సాదే మాచిలే. వాతేర్ ఇంకె గొగ్గి కోటెర్ కోర్ ఇంత ఇన్నెకె వాతేర్. "హా, వాంతేర్, వాంతేర్!" మస్త కుసాల్ ఆతకి మస్త కల్ బటింగ్ దొస్సి ఉత్త. కాల్ బటింగ్ దొస్సి ఉద్దెకెనే వాతేర్. "బతయ్ సాదే మాచిలే రా బహన్ కీంతిట్?" "హా, ఇంకె బతయ్ సిల్లే పేన్ ద మొసోర్ కొయ్యలై." కర్కెనె మొసోర్ కొయ్ తేర్ అని సాడితేర్.

మంగ్ బతంగ్? హా, ఇద్ గొగ్గి కూస్తా ఇంకె రోన్ వాయ్యులె కీ. "యేయ్ పెకురెర్ బాబ తేద యె నన్న తేద యె" "బహిన్ బారి దహన్ వడ్కంతి?" "నా మొసోర్ కొయ్ తేర్." "బహిన్ మాయిచ్చితె ఇద్దె నీవ సుఖం అని దుఖం మాయ్యున కెంజ్య మంజ్య." "మొసోర్ కర్కెనె కొయ్ తేర్ అద్

పలనా అద్దు సంగోయ్ అద్దు, గాయ్కి వోతడే, ఇహిన్ ఇత్త ఇంజెకె నన్న సాత్తోన్, అగ్గ సెల్లెతే నన్న బతంగ్ కియై సాందున్ అగ్గ."

సంగోన్ లాసి మొసోర్ సాడిత ఇత్తకే ఇద్ గొట్టా మొసోర్ సాత్త. సంగోన హెవా కీతెకే మొసోర్ దాంత, బంటిత్ గిర్.

